

## Truau alla mort Sedrun Mustér Turissem

■ (hh) Il punct culminont dil gliendis-tscheiver a Mustér ei dapi zacons onns la tschentada dalla Dertgira nauscha. Era uonn ha quella giu liug sin la piazza communal. Numerus aspectaturs e las duas musicas da tscheiver «Las Bagordas» e «Las Fiferlottas» ein stadas perdetga dallas sentenzias dil tribunal. Il tema central ei Sedrun Mustér Turissem staus. Duas undraziuns ha la Dertgira nauscha da Mustér fatg uonn. Il Calender Romontsch che vegn surdaus onn per onn a persunas ch'ei sefatgas meriteivlas en connex cun terminis ei ius a *Dumeni Columberg*. La dertgira ei stada dall'opiniun, ch'igl anteriur redactur dil Calender Romontsch e cusseglier naziunal hagi aunc adina terminis tut che buglia. L'otra honoraziun ei stada dedicata ad *Augustin Manetsch*. Quel obtegn il premi cultural 2000 per ses gronds merets en connex cun la renaschientscha dalla Dertgira nauscha a Mustér. Il tribunal ha constatau che quella fussi oz buc activa, sche Augustin Manetsch fussi buca staus sils calcogns e havessi reactivau ella. Ils derschaders speran da saver profitar vinavon dil cussegl guridic e da sias sentenzias sabias.

### La sentenza

Honurs ein denton mo ina part dalla Dertgira nauscha. L'otra ein las sentenzias ni las posiziuns ed ils commentaris tier biars schabetgs digl onn ora. En quella part han differentas persunas, interpresas ed instituziuns aschidadir in plaz stabel. Sin fundament dil curriu e passau ha Sedrun Mustér Turissem capeivlamein buca astgau muncar. Ils responsabels ein lu era buca mitschai dil tribunal local. Ina litania pli vasta ei ve-

gnida dedicata cumpleinamein all'interpresa turistica. Per finir ei Sedrun Mustér Turissem vegnius truaus alla mort. «Segner, nus savein che Ti sas buca exaudir tut nossas supplicas. Perquei prendein nus quei grev buordi da Tei e fagein in'ovra caritativa. La Dertgira nauscha truescha Sedrun Mustér Turissem alla mort e spera ch'ei detti buca ina renaschientscha.»

### Cass meins grevionts

La Dertgira nauscha che ha publicau sias sentenzias era a scret en fuorma d'ina gasettina, ei stada luvrusa, rimond e commentond biaras anecdotas. La Swisscom, la Posta, las pendicularas da Mustér e Sedrun-Rueras e naturalmein era La Quotidiana han survegniu honor per lur «ovras» digl onn ora. Mo era la mistralia ei vegnida sut la marella: «Il clom va tras la val; nus duvrein in niev mistral. Buc in giuven, buc in bi; ei vengonz dil bi manti. Na, ei sto esser in versau, sche pusseivel pensiunau.» La dertgira ha denton aunc constatau enzatgei auter: «Pertgei vulan ils biars candidats vegnir mistral e buca vicemistral? Perquei cura ch'els vegnessen lu finalmein mistral, stuess il stab da cumin accumpignar els cun crotscha e cavagl – ella casa da vegls.»

### Parc alpin, Expo.02 e CDU

Mo era il Parc alpin ei staus in tema che ha survegniu spazi ed era la Expo.02 ei buca mitschada dalla dertgira. Elecziuns communalas dalla suprastanza, dil cussegl e dalla cumissiun da gestiun ein vegnidas tematisadas, aschi bein sco la elecziun dils novs directurs dallas pendicularas e dalla Banca Raiffeisen. Ed era als purs ha la dertgira stuiu dar ina tecca: «Ils purs senumnan producents da latg. La Dertgira nauscha ha adina cartiu che las vaccas produceschien il latg.»

La dertgira ha denton era dau in sguard sur las scheinas dalla vischnaunca

ora. La CDU, la baselgia da Rabiis ed il Pass dil Lucmagn ein vegni tematisai. Mo era *Peider Ratti* e *Chasper Staupan* ein vegni sut las rodas.

Per finir ha la Dertgira nauscha fatg sia usitada votaziun, schebein ella duei turnar l'auter onn. Ils numerus presents han rispundiu quei cun in clar gie.